



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 3



Japan ato kilonser menden nung Fumio Kishida amentsü



Manipur nung Congress-i sorkar akümtsü: MP Pradyut

VOL. XVIII NO. 348 (ADOK 348) DIMAPUR

YANGTEPNÜ (THURSDAY)

RONGJUI (SEPTEMBER) 30, 2021 ₹ 5.00

COVID-19 Nagaland: 54 taneptsü angu, 24 dak putet & 1 asü

Kohima, September 29, 2021 (TYO): Nagaland nung tanü agi anogo pezübuba COVID-19 puteter dang nungibo taneptsü angur teimba liasü. Tanü nisung 54 taneptsü angu aser 24dak putet.

"Tesüiba ghonda 24 tsüingda COVID-19 puteta alir nisung 54 taneptsü angu. Parnokji Tuensang nung 16, Dimapur nung 14, Kohima nung 15, Phek nung 7 aser Longleng nung 2 lir" ta Integrated Disease Surveillance Project atema State Nodal Officer, Dr Nyanthung Kikon-i metetdaksü.

"Kasa mapang nisung 24 dak COVID-19 aliba putet. Parnokji Dimapur nung 13, Peren nung 4, Mokochung nung 3, Kohima nung 2 aser Kiphire o Phek nung kaka () lir" ta paisa ashi.

Nisung 31,219 rongnungi 29,199 taneptsü nguogo aser ibaji 93.52% lir, ta paisa shisem.

Tang nisung 365 anepaludara saka parnok 301 dakbo shirangba

yimya kecha mali, ta Dr Kikon-isa metetdaksü.

Bodbarnü Phek nung COVID-19 puteta alir ka asüba züingsema tasür ajak agi nisung 665 kümogo saka parnok 15 dakbo tanga tashidak liasü, ta paisa ashi.

"Mongulbar tashi nung nisung 686,522 nem COVID-19 vaccine indang dose 10,40,234 agütsüogo" ta State Immunization Officer, Dr Ritu Thurr-ia ashi.

"Vaccine agirtemji frontline workers 60,924, healthcare workers 15,996, arishi küm 45 ser temapur 197,938 aser arishi küm 18 nungi 44 tsüingda alir 411,664 lir" ta paisa ashi.

"Vaccine agirtem rongnungi nisung 353,712-i dose anaprong agiogo. Parnokji frontline workers 47,228, healthcare workers 13,250, arishi küm 45 ser temapur 135,906 aser arishi küm 18 nungi 44 tsüingda alir 157,328 lir" ta Dr Thurr-isa metetdaksü.

Advisor Dr Kire-i Kohima Street Carnival tenzüksüogo

Kohima, September 29, 2021 (TYO): India nüjiso ngur küm 75 ajungba tenüing nung Urban Development & Municipal Affairs Advisor Dr Neikiesalie Kire-i Kohima Street Carnival tenzüksüogo.

Iba sentong ya Azadi Ka Amri Mahotsav (AKAM) kübok Kohima Smart City Development Limited-i TaFMA, Kohima Municipal Council aser Brillante den yaritepa ayongzüker.

Kohima Street Carnival ya October 2, 2021 tashi Kohima nung Old NST area nung amongtsü.

"Kohima ama tesem ka nung ibala mesükba sentongtem balaka magir saka iba ya tetenzüker ka südakjang aser tarutsü anogotem Kohima nung alirtem asoshi ano sentong tajungtem ayonga agitsü moatsür" ta Advisor Dr Kire-i ashi.

"AKAM ya India sorkari tenzüksü sentong ka lir aser iba ya küm 75 tashi India renloka aruba benjugsü atema ayonga agir" ta KSCDL nung Joint CEO Avelu Ruho-ia ashi.

Anogo pezünü sentong nung KSCDL-i ghonda 75 urban transformation implementation inyaksü, ta laisa ashi.

"October 1 nungi Kohima kübok New NST nungi Razhü Point tashi teti atema 'no parking

zone' asütsü sangoktsüogo. Dokan kiburtemi iba tetuyuba sülen anidaksü aser KSCDL den yariteptsü mepishir" ta Avelu Ruho-isa ashi.

Tanü Kohima Street Carnival tenzüksü den külemi Nagaland Piano Festival (Open Street Segment) agi. Iba sentong ya Brillante-i ayongzüker aser pianists 40 temai shilem agia liasü.

Nagaland Piano Festival indang mezüingbuba series ji November 19 nungi 21, 2021 tashi Piano Festival nung tembangtsü.

Brihostibar anepdang 7:00 ako nung Fitness Reloaded: Zumba/ Taekwondo, anepdang 10:00 ako nung Botanical Extravaganza (Flower Exhibition and sale) aser nikongdang 1:00 ako nung Painting Competition alitsü.

Hokolbar anepdang 10:00 ako nungi Street Food Festival aser Musical Fair aser United Traders kima nung Blood Donation Camp alitsü.

October 2 anepdang 6:00 ako nung Cyclothon & Walkathon aser 10:00 ako nungi Open Street Children Carnival aser Street Food Festival & Musical Fair alitsü.

Anogoshia anepdang 10:00 ako nung teintet rogotem asoshi BP aser Weight measurement dena 'street health clinic' alitsü.

NDPP Kohima-i 2023 election atema meranga inyaksü

Kohima, September 29, 2021 (TYO): Taruba Nagaland general election nung Democratic Progressive Party (NDPP) Kohima Region-i constituency 6 prong nungi party candidate-i takok angutsü atema inyaksü bangzüngtepogo.

Bodbarnü Urban Development & Municipal Affairs Advisor, Dr Neikiesalie Nicky Kire indang office nung senden

amendang NDPP Kohima Region-i iba ya bangzüngtep.

Parnoki Kohima district kübok Assembly Constituency trokprong sema senzüksü aser party enrollment drive aotsü teletetba agi.

NDPP Kohima Region-isa Chief Minister Neiphiu Rio aser party President Chingwang Konyak lenisüba pusema nungittsü lemtet.

Tanü Dimapur nung ghonda 12 "Total Shutter Down" alitsü

DIMAPUR CIVIL SOCIETY TEMI DC OFFICE BELENA MEYOKTSÜ AKANGSHIR

Dimapur, September 29, 2021 (TYO): Home department-i tang aliba Dimapur Deputy Commissioner office nungi Chumukedima nung DC complex-i belentsü tetuyuba agütsüba meyipa agiang ta Dimapur nung amenoka aliba civil society temi state sorkar nem takhangba agütsüogo.

Bodbarnep DC court junction nung kin balala nungi lennirtem adenshia alidang Dimapur District Citizens Forum president, Yibemo Kikon-i sorkar dang akhangba metetdaksü. Iba sülen parnokki Deputy Commissioner, Dimapur indang office-i oa pa nem sorkar dangi züluba shidi agütsü.

Tang aliba Deputy Commissioner indang Office nungi shilem ka mesüra ajunga belena meyoktsü ta Dimapur nung amenoka aliba civil society temi metetdaksüogo.

Parnokisa September 29, 2021 nungi tenzüker anogo pungu tsüingda DC Dimapur indang letter head nung "HQ: Chumukedima; Camp: Dimapur" ta aliba agientsü takhangba agütsüogo.

Iba amai tashiyim agi mapa inyakra Civil Society aser sendaktepa aliba teloktemi lungkak aittsü aser iba indang teblemstüji onoki mabentsü ta parnokisa ashi.

Deputy Commissioner indang office ya tang aliba nungi belena maotsüla kechiyong iba ya 'cadastral land' nung lir aser iba tetezüji urban area nung lir. DC office belenba ajanga Dimapur nung alirtem kanga timtemtsü kechiyong Dimapur district nütsüing yongsük 50% den tema Dimapur Sadar sub division kübok alir ta Civil Society temi ashi.

Dimapur Deputy Commissioner indang office belena maotsü atema aiben shidi züluka Home Department-i

Deputy Commissioner's Office Complex tasenba nung District Election Office aser Disaster Management Cell belenoktsü tetuyuba agütsü. Parnokisa tanüingba kongsangtem tekaraba nung belentsü atema ashi, ta Civil Society temi metetdaksü.

Nagaland nung tanga district tem ama masü Dimapur nung revenue areas asem lir aser ano Dimapur ya shishilembadak yimtiba lir. Iba atema Dimapur Deputy Commissioner ya District Collector lir, ta parnokisa sorkar dang ashi.

State sorkar ya nübertemi shimtetba MLA temi akümba lir anungji sorkari item amala teletetba agidang nübertem taginüba metettsüla. Sorkari headquarter tangaleni belena aotsü lemtetba ama inyakra tensa mejungi akümtsü ana nung lir, ta parnokisa metetdaksü.

Nagaland Home Department-i DDCF dang mepishir

Dimapur, September 29, 2021 (TYO): Dimapur district nung alirtem ajak ajungtsü tangatetba nung Nagaland sorkari Deputy Commissioner indang Office Complex Chumukedima-i branches/cells kar den office kar belentsü teletetba agi. Anungji Dimapur District Citizens' Forum (DDCF)-i September 30, 2021 nü 'total shutter down' asütsü ayongzüksüba meyipa agitsü mepishir, ta Principal Secretary, Home, Abhijit Sinha-i tanü metetdaksü.

August 10, 2021 nü Nagaland state Cabinet senden amendang Deputy Commissioner indang Office Complex Chumukedima nung ADC, EAC aser Sub Treasury Officer mapa lenzütsütsü teletetba agi, ta paisa ashi.

Iba senden nungsa New Complex-i DC Office indang

EAC Chumukedima nung ADC mapa lenzütsüba ajanga maparen kar inyaksü ama sayur. State sorkari ibala ketdangsuba maparen inyaksü akok saka inyakyim shitak meinyak. EAC aser ADC mapatem den ano SDO (Civil) indang mapa ka adoka lir, ta Civil Society temisa ashi.

Sorkari iba teletetba atema jashiba sayua Dimapur nung amenoka aliba civil society temi September 30 anepdang 6:00 ako nungi nikongdang 6:00 ako tashi "shutter down" alitsü ayongzüksü.

Ajisüaka, mokdangba mapang nisung aser garitem senzütsü melar aser medical dealers, pharmacies, shisaliok rejutem, sorkar aser nija office tem lapoktsü, ta Media Cell, Dimapur Civil Society Organisations' sangdong ka nung metetdaksüogo.

branches/cells kar den ano tanga office tem belentsü lemteta liasü. Cabinet-i Dimapur district nung alirtem ayongtsü tangatetba nung iba teletetba agi.

Tang aliba Deputy Commissioner office tera pongpadaktsütsü nükjidong nung branches/cells kar den office kar New Complex-i belentsü lemtet. Iba ajanga district nung alirtem ajangzüksü, ta Abhijit Sinha-i metetdaksü.

Anungji Dimapur District Citizens' Forum (DDCF)-i September 29, 2021 nung Ultimatum agütsüba meyipa agitsü aser September 30, 2021 nü 'total shutter down' masütsü atema mepishir, ta paisa ashi.

Dimapur nung 'shutter down' aliba ajanga rongsenkettsüing tsütsü takoksa jenti ajuruba den nübertemi timtem ajurutsü ta Principal Secretary-isa metetdaksü.

Sorkari junga meshisadangi Dimapur DC headquarter belentsü lemtet: NPP Nagaland

Dimapur, September 29, 2021 (TYO): Civil Society teloktem, kin hohotem aser kaketshir tentettemi Dimapur Town nungi Chumukedima Village-i DC headquarter mebelentsü atema aiben shiaka state sorkari tekong meranga noktakba ngua kanga aoksar, ta NPP Nagaland State-i metetdaksüogo.

Iba ken o timi angatetteptsü amanger aser ozüing alema inyakba mapa magizüker. State sorkari parnok sünütsü süa iyakba anema asenok longjemer timi noktaksü ayongzüker, ta NPP, Nagaland-isa ashi.

Iba ajanga Nagaland state sorkar ya populist masü saka police government ka ta sayur, ta parnokki ashi.

"Sorkari meshisadangi

Chumukedima Village-i DC Headquarters belentsü lemtetba magizüker. Dimapur jila nung meta talang pilar aliba yim ka nungi Dimapur Municipality ketdangsuba ajanga nübertem kanga timtemtsü anungji sorkari iba teletetba ya kechi atema agi ta asüingdang" ta NPP, Nagaland-isa sangdong nung shia lir.

State sorkari tensa meraksatsü mechi nung Chumukedima-i DC Headquarters belentsüba onük jungjunga shisadangtsü ayongzüker, ta parnokisa ashi.

Dimapur ya Nagaland atema dang masü saka Manipur aser Karbi Anglong, Assam atema shishilembadak tiyongtsü tesem ka lir. Anungji Dimapur jila tiyongtsü nungi ketdangtsüla.

Külen, National Highway nung mapangshia lendong ataloker aser District Headquarters belenba ajanga traffic khuret tuluba akümtsü aser sensotem lendongi aitsü ana nung lir, ta NPP, Nagaland-isa ashi.

Maneni, public transportation system tajung mali anungji public-i senzüsenbongdang sen aika endoktsüsa akümtsü.

"State sorkari iba tetuyuba meyipa magitettsüsa süra, Dimapur District nung ketdangsubaren Dimapur Rural (ADC) aser Dimapur Urban (DC) ta lemsatsü akhangar. Yamaji asü nungbo tang aliba Dimapur Town indang Headquarter ya Dimapur Urban indang Headquarter ama inyaka otettsü" ta parnokisa ashi.

Kohima nung Street Piano Festival agi



Street Piano Festival sentong September 29, 2021 nü Old NST Parking, Kohima nung agiba mapang tangokba noksa nung angur.

Dimapur, Rongjui/Sept. 29 (TYO): Azadi Ka Amrit Mahotsav (AKAM), Kohima Street Carnival nung shilem ka ama Street Piano Festival sentong September 29, 2021 nü Old NST Parking, Kohima nung agia liasü.

Iba sentong ya Kohima Smart City ajanga Brillante, the Nagaland Piano Festival den lungjemer ayongzüka liasü.

Iba Street Piano Festival nung arishi küm telemsa melie nisung aikati piano tema liasü. Iba Street Piano Festival ya asembuba Nagaland Piano Festival, Brillante indang curtain raiser ka ama alitsü, koba Nagaland nung 2017 küm tenzük.

Iba benjongmung asembuba ya COVID-19 tashidak wara mechi virtual yimya nung ayongzüka agitsü. Ibai international sentong ka lir, aser yangi linük ti nungi shilem agitsü jangaogo, koba November 19,

20 aser 21 anogotem alitsü.

Azadi Ka Amrit Mahotsav (AKAM) ya India nung nujiso ngur küm 75 ajungba benjongtsü nungtem nung Government of India ajanga yangluba sentong ka lir. Ministry of Housing and Urban Affairs (MoHUA) kübok Smart Cities Mission (SCM) ajanga Azadi Ka Amrit Mahotsav kübok hopta 75 benjongba nung shilem ka ama Smart Cities 100 nung September 26, 2021 nungi October 2, 2021 tashi atema sentong jenti yanglua lir.

Item sentong nung Smart Cities tem dang COVID-19 tashidak nungi jenbua alitsü meratem agir yimti nung nüburtemi amshiba tesentem nung nübör ajangzüksüsa sentong balala ghonda 75 agitsü ashi.

Yamaji Kohima Smart City-ia Kohima Municipal Council aser danga sorkar department balala, local music & fitness

institutes aser lokti tentet balala den lungjemer New NST nungi Razhu Point tashi nung 'Kohima Street Carnival' sentong ka September 29 nungi October 2, 2021 tashi ayongzüka lir.

Iba sentong kübok asüing-ser aoba anogotem nung De Operettas Music Institute den lungjemer Zumba, TaFMA den lungkemer Busking, Office of the Chief Medical Officer den lungjemer teintet rogotem atema Street Health Clinic, Kohima Village Women Organisation den lungjemer Flower Exhibition & Sale, Nagaland Mountain Biking Association den lungjemer Cyclothon, Voluntary Blood Donors Association den lungjemer Blood Donation Camp amala ayongzüka agitsü.

Maneni iba sentong nung Street Food Festival, Painting Competition, Walkathon aser tanurtem atema Street Carnival ayongzüka agitsü.

Changtongya nung Waste Segregation Awareness sentong agi

Dimapur, Rongjui/Sept. 29 (TYO): India nung nujiso ngur küm 75 ajungba nungtem nung Changtongya Town Council ajanga September 29, 2021 nü Dobashi Customary Court, Changtongya nung Waste Segregation Awareness sentong ka ayongzüka agia liasü.

Iba sentong nung N. Tamsu, SDEO Changtongya ajanga iba

awareness nukjidong rateta ashi. Paisa, India nung nujiso ngur küm 75 ajungba nungtem nung tenzükba Azadi ka Amrit Mahotsav sentong kübok September 29, 2021 nungi October 2, 2021 tashinung campaign aser sentong balala agitsüba indang metetdakja liasü.

Pai iba sentong nung

adenertem dang nüburtiem nem jana bendanga indoktsü indang angazükdaktsüsa ajungshia liasü.

Iba sentong nung Lanunukshi, LDA, SDO (C) Office, Changtongya menden liasü aser Tsuknungwaba Dobashi I/C Changtongya ajanga sentong tenzükba sarasadema liasü.

KMC ajanga 'Waste Segregation' nung workshop ayongzük



Kohima Municipal Council indang Conference Hall nung September 29, 2021 nü Ward Sanitation Committee zungsemtem atema "Waste Segregation" indang awareness workshop ka ayongzüka agiba mapang tangokba noksa nung Administrator KMC, T. Lanusenla Longkumer den shisalen sayur aser sentong nung shilem agirtem angur.

Dimapur, Rongjui/Sept. 29 (TYO): India nung nujiso ngur küm 75 ajungba nungtem nung tenzükba Azadi ka Amrit Mahotsav sentong nung shilem ka ama Kohima Municipal Council (KMC) ajanga Conference Hall nung Ward Sanitation Committee zungsemtem asoshi jana bendangba indang awareness workshop ka September 29, 2021 nü ayongzükja liasü. Iba workshop ya "Kachra Alag Karo Amrit Diwas" yimyim kübok ayongzüka liasü.

Ibasentong nung shisalen

sayur Zakiexhotuo Kiso, Office Secretary, KMC ajanga "Waste Segregation" onük nung jemi, Keduvi Zhotso, Advocate cum Panel Lawyer, KDLSA ajanga "Duties and responsibilities of local authorities and village panchayat of census towns and urban agglomerations - under Solid Waste Management Rules 2016" onük nung jemi aser Asenla Walling, Advocate cum Panel Lawyer, KDLSA ajanga "Criteria and actions to be taken for Solid Waste Management in the hilly areas under Solid Waste

Management Rules 2016" onük nung ajemdaker jemia liasü.

Iba sentong nung Administrator KMC, T. Lanusenla Longkumer menden liasü aser AKAM nung shilem ka ama KMC ajanga October 2, 2021 tashi sentong balala ayongzüka agitsü, ta lai metetdaktsü.

Maneni Community/Pay and Use Toilet Caretakers, Waste Entrepreneurs nem tetushi agitsüba aser Sanitation workers atema awareness workshop tem ayongzüka agitsütsü, ta laisa ashi.

Dimapur Aor Ordained minister tem senden alitsü

Dimapur, Rongjui/Sept. 29 (TYO): Dimapur nung aliba Aor Ordained minister ajak mensem ka October 1, 2021 nü Dimapur Ao Baptist Arogo (Main Church Duncan) nung ayongzüka lir, ta Rev. Dr. Kari Longchar ajanga sangdong ka nung ashi.

Lokti temenen ajanga asen lima raksatsüba ya yamai

dangbo ajia meliteter. Anungji Dimapur lima nung alir Aor Ordained minister ajak Dimapur Ao Baptist Arogo (Duncan Main Church) nung Mongputeni (October) 1, 2021, Hokulbar anepdang 10:00 ako nungi tezüka mensem ka alitsü ayongteper, anungji ajak medema arua adentsü mepishir, ta sangdong ajanga ashi.

Tribal Literature Board/Committee senden ayonger

Dimapur, Rongjui/Sept. 29 (TYO): Nagaland nung aliba Tribal Literature Boards/Committees ajunga den shisadokten senden ka October 5, 2021 anepdang 11:00 ako nungi tenzükba Morung Conference Hall, Directorate of School Education nung alitsü, ta

Principal Director, Directorate of School Education, Shanavas. C, IAS ajanga sangdong ka nung metetdaktsü.

Iba senden nung Tribal Literature Boards/Committees shia nungi zungsem ana-na arua adentsü mepishir, ta sangdong ajanga ashi.

Mokokchung nung aliba CHOs aser ANMs nem NCD training agütsü



CHOs aser ANMs atema Non-Communicable Disease application training agütsüba mapang shisalen sayur Vitsiatho Nyuwi (TATA TRUSTS SPO) ajanga PowerPoint presentation agütsüdang tangokba noksa ka yangi angur.

Dimapur, Rongjui/Sept. 29 (TYO): Mokokchung nung aliba CHOs aser ANMs nem Non-Communicable Disease (NCD) application training ka September 29, 2021 nü CMO Conference Hall, Mokokchung nung agüja liasü.

Iba training ya NPCDCS, NHM, Directorate of Health & Family Welfare ajanga TATA TRUSTS nungi technical teyari agüja ayongzüka liasü.

Iba mapang arishi küm 30 nungi tema nisung ajunga hypertension, Diabetes, Oral Cancer, Cervical cancer aser Breast Cancer atema tenung zülüoktsü aser teyari agütsütsü, Non-communicable Disease enrollment and Screening indang data upload asüba

mapang tablet amshiyim nung training agüja liasü.

Dr. Mereninla Senlem, Joint Director & SPO NPCDCS ajanga National Programme for Prevention and Control of Cancer, Diabetes, Cardio Vascular Diseases and Stroke indang lemsatapa liasü.

Lai training agir dang pei health unit nung NCD enrollment timba kumdaktsütsü ajungshi.

Iba training nung Vitsiatho Nyuwi (TATA TRUSTS SPO) ya shisalen sayur liasü.

Iba training nung Dr. Ebenezer Phesao MO (NCD) aser Directorate of Health & Family Welfare nungi Srare SCD cell staff tem arua dena liasü.

Changtongya nung OUCT pur hon jubilee mungogo



Dimapur, Rongjui/Sept. 29 (TYO): Ongpangkong Union Changtongya Town (OUCT) pur küm 50 ajungba Hon jubilee

mong September 28 2021 nü Longma Watsu Sungki, Changtongya nung munga liasü.

Iba sendong nung tongti acha Tsuktimeren, tir, Ongpangkong Mungdang liasü aser pai jubilee nungo kaket sayaja liasü. Iba sendong nung OM tir-i anir ketdangpurtem ajak, village council Akhoya, Changtongya, All Ward Union Changtongya, Changtongya Town Ward terka nungi chairman, Asetkong aser Jangpetkong union Changtongya, anükapang aser Ongpangkong nübu tila tulu ajak kanga temoatsü nung munga liasü.

United Liberation of Bodoland züngsem 12 temai adok



Udalguri/Guwahati, September 29, 2021 (Agencies): Bodbarnü United Liberation of Bodoland (ULB) züngsem 12 tashi Udalguri superintendent of police tsüngdang temai adokogo.

Udalguri district kübok Badlapar tea estate nung parnok temai adok.

Udalguri superintendent of police Hiranya Barman aser tanga ketdangsürtem lia telungpur 12 temai adoka bendanga agütsü.

"Parnok temai adokba züngsema ULB züngsem ajak temai adokogo" ta Assam chief minister Himanta Biswa Sarma-i ashi.

"Lanurtem temai adoktsü atema onoki meranga inyaker.

Tawa tasen tentetba United Liberation of Bodoland (ULB) züngsem ajak tanü temai adokogo" ta Chief minister Sarma-i ashi.

"Onoki Assam tajungba yangertsü merangba nung parnoki shilem agitsü adokba atema pelashishia agizüker" ta paisa metetdaksü.

"Parnok kidangi meyipa aruba atema pelar" ta Assam Police-ia ashi.

"CM Office Assam-i tuyuba ama Assam Police-i United Liberation of Bodoland züngsemtem temai adoktsü ajungmesogo. Parnok kidangi meyipa aruba atema pelar" ta Special DGP of Assam, GP Singh-i ashi.

"Tawa tasen tentetba ULB telok nungi züngsemtem aser lennirtemi ozüng alema inyakba anentsü lemtetba pelashishia agizüker" ta Bodoland Territorial Council (BTC) chief executive member (CEM) Pramod Boro-ia ashi.

"PM Narendra Modi-i Assam aser BTR nung yimjung bener arutsü alizüng ayuba ama Chief Minister Dr Himanta Biswa-i inyakba atema pelar" ta paisa ashi.

Bodoland balaka kümtettsü aser National Democratic Front of Bodoland (NDFB) founder chairman Ranjan Daimary chioktsü takhangba agüja ULB tenteta liasü.

Manipur nung Congress-i sorkar akümtsü: MP Pradyut

Imphal, September 29, 2021 (Agencies): Manipur nung Congress-i taruba sorkar akümtsü ta Lok Sabha MP aser Manipur Assembly election atema Congress observer Pradyut Bordoloi-i metetdaksü.

Sangküm Assembly elections agitsü aliba dak sendakba onüktem lemsateptsü atema Pradyut Bordoloi-i yashi Manipur semdangi arua lir.

Congress lennir Bordoloi-i Manipur nung anogo asemnü amongtsü.

"Onoki Manipur nung taoba Assembly elections nung

tera agi dang tamakok angu, saka tangbo onoki sorkar akümtsü" ta Pradyut Bordoloi-i ashi.

Manipur nung amongdang Bordoloi-i state party lennirtem, MPCC ketdangpurtem aser züngsemtem den ajuruteptsü.

Manipur nung political party ajaki sangküm Assembly elections atema maparen tenzükogo.

Tawa tu Manipur chief electoral officer-i 2022 küm tetenzüklen Assembly elections agitsü akok ta osang metetdaksüogo.



Bodbarnü Morigaon district administration-i Rs 4 crores 80 Lakh alang mozütem rongdokba angur. Drug Disposal Committee-i ken o 105 nung apuba mozütem raskaa endok. Iba nung Ganja seret 198.478, Heroin gram 561.89, Cough Syrup bottles 6289, Brown Sugar gram 212.01 gm aser mozü süngjang 83,151 liasü ta Special DGP Law & Order, GP Singh-i metetdaksü. (Morigaon, September 29)

Assam sorkari HPCL mapa inyaker nem itasen agütsütsü

Guwahati, September 29, 2021 (Agencies): Assam sorkari Hindustan Paper Corporation Limited (HPCL) nung mapa inyaker nem itasen magütsüi aliba agütsütsü.

Assam chief minister Himanta Biswa Sarma-i HPCL nung mapa inyaker tem den ajurutepa senden ka amenba sülen iba osang metetdaksü.

Guwahati nung Assam CM Himanta Biswa Sarma indang office nung sendenji ghonda pezü tema amen.

"Hindustan Paper Corporation mapa inyaker tem den

mapang talangka itasen aser tanga sen magütsüi aruba onük angatettepogo" ta CM Sarma-i metetdaksü.

"Kü office nung ghonda 4 tema senden amen aser tanep 2:00 ako nung ang tembang" ta paisa ashi.

Assam nung HPCL paper mill ana- Cachar Paper Mill and Panchgram, Hailakandi district October 2015 aser Nagaon Paper Mill, Morigaon district March 2017 nungi shibanga lir.

Assam nung Sarbananda Sonowal-i 2016 nung Chief Minister akümba sülen BJP

sorkari paper mills lapokshitsü nangzüka liasü.

Iba paper mill ana nung mapa inyaker temi tesüiba ita 55 tashi itasen mangui arur.

Tesüiba ita 58 tsüngda paper mill ana nung mapa inyaker nisung 93 tashi süogo.

Assam sorkari Hindustan Paper Corporation Ltd indang mill ana alizüktsü aser iba nung mapa inyaker nem Rs 570 crore relief package agütsütsü.

Iba tenangzüktep nung Sarma aser Industries Minister Chandra Mohan Patowary na den employees' associations lennirtemi sign asü.

Assam nung Maoist lennir temai adok

Guwahati, September 29, 2021 (Agencies): Assam nungi Maoist lennir Tingraj Orang-i police tsüngdang temai adokogo.

Mongulbarnü Tingraj Orang-i Guwahati nung Assam ADGP (Special Branch) Hiren Nath tsüngdang temai adok.

Orang-i Assam kübok Brahmaputra aser Barak lendenlen Maoists maparen akangshia liasü.

Pa ya CPI-Maoist indang Assam State Organizing Committee (ASOC) convenor liasü. Pa temai adokba ya Assam nung CPI-Maoist atema tetsükdaksü tulu ka lir,

ta Assam Police-i sangdong ka nung metetdaksü.

Orang ya Dibrugarh district kübok Samuktola nunger lir. Pai 2007 küm CPI-Maoist nung aden.

Maoist lennir Orang ya süngolu ayimba kin nungi lir aser Jharkhand nung training agia liasü. 2011 küm pa Orissa kübok Sundergarh district nung apu aser Assam-i anir aru saka pa bail nung chiok.

Pa bail nung chiokba sülen telungi ai aser idang nungjagi jenshia dang aru.

Yaküm June ita Orang kinungtsü asüba sülen tena tanur asem tashi teyarir mali aküm.



Naga lisapur lennir Athuan Abonmai tepsetba sülen tentetba Joint Action Committee (JAC)-i Bodbarnü Imphal kübok Keisampat Leimajam Leikai nung lungkak aitba angur. JAC nung civil society 16 nungi züngsemtem dena lir aser teloktem rongnung CSO AMKIL, NUPI SAMAJ, CHINGMI-TAMMI, EECHAL, THOUBAL EMA, NIPCO, CADA, MAPI COUNCIL aser NIPCO dena lir. Parnoki Abonmai atema temeten meshiba den pa pur oa tepsetertermerenshitsu takhangba agütsür. (Imphal, September 29)

Tripura HC-i state sorkar dang telangzuba meshir

Agartala, September 29, 2021 (Agencies): Tripura nung BJP-i aniba sorkari Agartala nung political party tem indang sentongtem magitsü tenokdangba agütsüba atema Tripura High Court-i notice ka agütsüogo.

West Tripura district magistrate-i November 4 tashi Agartala nung political rally magitsü tenokdangba agütsüba anema High Court nung Public Interest Litigation (PIL) ka benok aser iba nung ajemdaker okadaki state sorkar dang telangzuba meshiogo.

Tripura High Court chief justice AA Kureshi-i aniba bench-i iba tetuyuba agütsü.

Tripura sorkari Agartala nung Trinamool Congress (TMC) indang sentongtem magidaksütsü atema CrPC indang section 144 ozüng agütsü.

Tripura sorkari tenokdangba agütsüba sülen tawa tu TMC-i sentong ajak athi.

Maneni, TMC-i Tripura High Court dang Agartala nung rally alitsü asüngdang saka ibaji magizük.



TIR YIMYIM YIMOBILEM (EDITORIAL)

DIMAPUR YANGTEPNÜ, RONGJUI (SEPTEMBER) 30, 2021

Ajak arogo mapa kümogo !

Tia junger majung ka, Nagaland nung aser ano talisa Ao lima nungbo Election merüka agitsüba nungi tenzüker machimajemtsü nokdangba aser gari lenmang yanglushiba mapatem ajak arogotemi dang inyaksüsa akümba angur. Itemji angudang arogo lenirtem dang pelar saka ano külenbo, Nagaland nung government aliba ya asangsang nung masü pongmang nung angur amai dang bilemer. Aji oda, joko arogo ya arogo nungertemi tai ajak tongloksü dak aser tai ajak abenba kangki mesüka kümogo. Atangji, arogo ya sannüker aser sannükla mesüra tenzükeritem kija masü saka arogo nung tamanger züngsem ajakji arogo nunger lir. Anungji, arogo Election merüka agitsü meranger, machimachijemtsü nokdangba aser gari lenmang yanglushir, tzü tajemtsü bener arua agütsür aser shirangertem asoshi nungdak bener arua yarir ta asüba mapatemji arogo nung toklang tenzükeritem mesüra deacon-tem kijai inyaker masü saka arogo nung züngsem ajakji inyaker. Ajisüaka, arogo inyakba mesüra meinyakba indang jembidang, jet ta asenoki pastorba mesüra deacon-tem dak dang rangloker, kechiyong lokti senden malidang parnokiang rongdak nungdak ajak nung telemtetba agia inyaker. Aji oda, kasa arogo nungersa süka lenirtemiang khuret tuluba abener. Ajisüaka, iba jagi arogo nung ka tuluba aser ka tilaba ta mali, ajak kasasa khuret aser maongka lir. Aiben asenoka arogo nunger ser nung arogo ayongzükba sentong aser inyakba mapatem nung asenbo maden amai jembir. Ashiko, ibaji asenoki arogo tetezü junga mangatetba agi asütsüa akok mesüra tenla agütsüba nung shilem junga magiba agi arogoji tangar telok ka meyong amato bilema jembir asütsüa akok. Ashi, asenok ajak asen arogoji asen adenba arogo aser asen meyong ama bilema, Tsüngremi mulungba sentongtem nung shilem agitsü merang nungbo, arogo inyakba mapa ajakji asen pei mapa ama bilema jembitsü aser inyaksü. Atangji, tanü arogotemi tanüla nung ajungshitepba aser samaa aliba tanülatem anir aruba mapatem nung dang masü saka alima terenlok mapatem nunga shilem agitsüsa akümbaji alima yimten tashi maitba ajanga lir. Iba jagi alima yimten tashi mait dang mesüra Clean election magitetba agi, arogo khuret aser mapa tali akümer ta sayur. Alima nung machimajemtsü chia ajemer aser shibelenertem azüoktsü asoshi government nung ita sen dang masü saka nungdak ajak peria agütsür department tenteta lir, saka tenokdangtsü purtemi shitak meinyakra, koda asütsü ? Alima nung yimten mapatem ajak indangindanga merüka inyaksü asoshi ozüng lir, saka itemji shitak amshitsüsa yimteni nübortem mazüoktetra, koda asütsü ? Alima nung nübortem jajatsü atema government nung gari lenmang anepalutsütsü purtem lir, saka parnoki nübortem gari lenmang majungba agi nungdak meinyaktet aser arogo Tsüngremi tenyaba mapatem sadema meinyaktetsüsa timtem ajurubatemji mangu aser mangashi kümra, koda asütsü ? Iba jagi, talisa Jangpetkong nung arogo lenirtemi anir mapang mapang shia nübodoka arogo rongsen agi gari lenmang yanglushiba asenoki angur. Ano, tangbo parnokiang yimtsüng shia yimten yimsüsürtem jatapa yimkong lenmang yanglushitsü jembibaji tepelatsü saka tesüngmangtsüka lir. Mapa ajak, iba amaisa, arogo dang inyaksüsa aküm nungbo government nung Road & Bridges, Election, Excise, Health aser Social Welfare portfolios aser buget-tem yabo arogo nem agütsütsüla ta bilemer. Tang amaisa asen lima nung yimten yimsüsüba tia ya ao nungbo, asüngbo police mapatem dena arogoi repringtsüla adoktsü. Yimteni inyaksüla ser nung meinyakba agi arogoi inyakbaji junger, kechiyong kotak matongdang alima nung nübortem asoshi katibosa inyaksüla, ajisüaka yimten melen arogoi inyakba mapatemji tajung-tazü masü. Asenokbo peisasa pei mulungjang khen bushidi aser pei mapa khen asadangdi. Naga nungertem ya, balaka, nisung ajak Yisu dak amangertem dang, anungji yimten nung inyakeritem arogo nunger aser arogo nungerjiang yimten nung inyaker, nisungbo ka dang saka telok balala nung pei pei shilem agir. Shitakba agi arogo mapajibo tanüla kümzüksüba mapatem dang lir saka tanüla mekümzükjungi taküm samara ta bilemba agi, aiben tanüla kümzüksüba mapatem nung amshitsüba nübo aser rongsen alima terenlok mapatem nung amshitsüsa akümer. Ibaji yimten nung shibai mesüra shirnoki inyaksüba ser nung meinyakba agi, Tsüngremi mapa nung amshitsü agütsüba tenla sen aser nübo alima terenlok mapatem asoshi amshitsüsa akümer ? Ibaji asen süra, Yihuda Iskariot ama, asen rongsen meyipa agütsüdi asüyonga Tsüngremi magizüksü !

OLEMSABANG

Kü Meyongnem! Kü Temeden! Elizabeth Cady Stanton nungi Tangazüksü kar

- Bendanglemla Longkümer

(Yashi adok nungi...)

Yimdenren nung shilem agibaji temenen ama bilemer anungji Khristan/tamanger kati iba nungi pilaa alitsü merangba jagi alima yangluba nung shilem tongtibang ka magir ta bilemstüla. Tamajung ta metetsümonga odang toktsüba, pei meyongnemji pei temeden meyongnem ta angateta nüburtemi meyongnem agütsüba (exercise) nung shilem agitsüla. Kija shiai iba ya mangatet ashi, election mapang tashiyim amshiba yimya ya maidoktettsü. Nisung shiai angateti, pei meyongnemji pei temeden anungji nai aser ni iba nung shilem magira, alima tejakleni aotsü sentong nung tongtibang shilem ka magir ta bilemstüla. Na aser ni iba nung sentsühtsür ka masütsü kümdangtsüla. Aji süra tanü Nagaland nung Clean Election campaign ya takok mapa asütsü.

Melepzung/Tangazüksü onük kar

Elizabeth Cady Stanton taküm nungi tangazüksü tongtibang kar yamai angur. Mezüngbuba nung, pei sasa moutetaka, tezüluba ajanga lai alima nem la ola angashidaktsü. Ibaji aikatibo meinyaktetsü südi, saka tanü asüng social media platform balala ali nung, itemji amshia, asen lima nüburtem, yimsüsübaren, tamangbaren aser loktilibaren inyakyim koda tajungba melenshia aotsü item tebilembatem metangoktsütsü ajungshiteptsüla.

Tanabuba nung, tamakoktsü amai saka lai tasü itta, nisung ka temeden atema onük balala nung ozüng melenshitsü ayongba nung küm talangka sülen nüburtem nem tongtibangsa tetsürtem loktilibaren talenba nungi nüchiso agütsü. Tanü tetsürtem ochimashi sobaliba talenba kübok lir aser iba atema ochi yimyim agütsütsüla.

Tasembuba nung, ozüng nung kenyongi dang maliba inyakyim aika nung temelenshi bener arutsü, talisa voting temeden anguba dang masü, candidate ka asütsü temsüa aküm. Tanübo meyongnem temeden dang masü yimsüsübaren menden nung tetsür amentsüsa loktilibaren yangertetsübaji Stanton meranga inyakba ajanga ta meteter. America nung tetsüri meyongnem nung shilem agitetba ajanga yimsüsübaren aser loktilibaren nung inyakyim aika yanglushia arudar. Tetsürtemi yimden yimsüsüba nung tokteptsü jangratsüla, ajungshitsüla aser temulung ulutsüla.

Pezübuba nung, pei shilem kechi aji pei-isa inyaksüla ta asüba tangatetba agütsür. Tangar majungba angur, jembir saka pei teinyaksü temeden meinyaki mokorai aliba ajanga teraksa lima nungji asenia shilem agir ta metetdi. Yimsüsür anema jembitsüba dang nungibo kechi majung aji yanglushiba nung shilem agitsü nisung shiai mulungtettsüla. Aser aji koda sür shilem agitsü ta süra, pei temeden koba meyongnem temeden lir ibaji tangar nem rakzüker meyoktsüla, sen/rongsen yong mayoktsüla, saka pei-i koba lenir ajanga lokti tejakleni anitsü sempet akaba, ochishir lenir shimtsü nü meyongnem ajanga shimtsü lemtetsüla. Aseni ibaji meinyakra asen temeden meyongnem tangar sünggra nungsa alena lir ta meteti. Meyongnem ayokbaji temenen ta angatetdi aser tarutsü senso yoka achir ta angatetdi.

Tatamsa, Stanton la tashi temeteter kibong nungi soa intetba jala ka süka lai tekübok nung aliba nüburtem atema temulung agüja la taküm bendanga agüja tenzüker. America nung loktilibaren ajungtsü mechi tebur aser tetsür, nüchiba aser alar ajak atema temeden meyongnem akatsüla ta takhangba sendentem nung shilem agi. Nibo junga lirji, tangar ka timtem jagi kü dak kecha masütsü ta tangatetba nung asen sasa loktilibaren ajungketdaksüba maparen nungi atsünga melili. Saka arok ajungtsü mechi nung kechi majung aji repringteta tim shisatsü lemsatsü asen sasa rataa melili. Yamaji süra asen lima rongsen ketsüng nung tangar memenepba, terenlok makaba, pei atema dang bilemba item mesükba shirang tapu ajak nungi nüchiso ngua ajak shilem tajung agia asen Naga lima tajungba yangluloka, melenshia aotsü, Anungji mangdang akaba lenir shimdi. Lenir shirnoki lokti terenlok atema kecha meinyak, saka election nung sen meyongnem alitsü aser tashiyim amshia tata memden angutsü meranger parnok nem kechiyongi yimsüsüba menden magütsütsüla. Parnoki asen lima yoka achitsü aser teraksa bener arutsütsü. Anungji "Kü Meyongnem, Kü Temeden" ochi nung ammetdi ta ayongzüker.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Tuli nung Bible Society of India Tuli Branch semzükogo



Mokokchung, Rongjui/ September 29 (TYO): September 28, 2021 nü Tzüdikong Baptist Church, Tuli nung Bible Society of India Tuli Branch semzükogo; BSI Tuli Branch semzükba den anogo ka seminar repsema agiba sentong nung Arogo 15 nungi lenir 90 dak tema aden.

Iba sentong nung BSI Mokokchung Branch Tir, Dr. Bendang Longkumar-i tajungshi o jembia liasü.

Tamangertem den Tsüngrem O lemsatepba aser pei oshi nung Laishiba malirtem den Tsüngrem o lemsatepba tsütsü BSI ministry nung shilem agitsüji kanga tongtibang, ta pai ashi.

Sentong nungsa Auxiliary Secretary, Rev. Dr. Yiepetso Wezah-i Bible Society of India

indang ministry inyakyim metetdakja liasü.

"BSI ya mission inyakba society ka lir aser iba society atema tongti nükjidingji nisungtemi angatetba oshi nung nisung ajak nem jenjang dalang agi Laishiba agütsütsü atema lir," ta pai metetdaksü.

"BSI-i Lai meyipzük, adoker aser lemstür. BSI-i nisungtem nem Tsüngrem O angatetdaksüba tsütsü yarir. Aseni moutetba tesem ajakleni Laishibaibo oteter, anungji tamangertem BSI Ministry nung shilem agitsüla," ta pai ayongzük.

Marwati Resource Mobilizer-i BSI Branch aser Arogotem teinyaktsü shilem metetdaksü aser BSI Mokokchung Branch Secretary, Tamsu-i Arogo lenirtem dang

iba ya Arogo atema tongtibangba ministry ka südaksütsüla aser shilem agitsüla, ta ayongzük.

Iba sentong ya Aitlenden Baptist Arogo nung pastor, Anung leniba nung agi, Tzüdikong Baptist Arogo nung Deacon, Bendangwati-i temoatsü meshia sarasadem aser Tzüdikong Baptist Arogo nung pastor, Moa-i lokti pelaa agizükba o jembia liasü.

Luyong Baptist Arogo nung pastor, Rev. O. Lima-i tenla meshiteta sarasadem aser BSI-i iba sentong agiba Arogo nung lenirtem aser iba sentong nung shilem agir ajak dang pelaba lemsatep. Tesüsa Associate Pastor Women Department, Rev. Mapula-i sarasadema sentong tembanga liasü.

India nung Khristantemi anti-conversion ozüng agientsü akhanger

New Delhi, September 29, 2021 (Agencies): India nung Khristantemi Centre sorkar dang state balala nung sorkari benoka aliba anti-conversion ozüngtem agientsü atema tiyongtsü ia inyakdaksüner, ta takhangba agütsüogo.

September 28, 2021 nü New Delhi nung Minority Affairs Minister, Abbas Naqvi aser junior minister, John Barla na den senden amenba mapang nung Khristan lenirtemi, pei shimtetba tamangba yimsü ka agizüktsü mesüra amanga benshitsü nokdangbaji India temzüng nung agüja aliba temeden alema lir, ta metetdaksü.

Khristan lenirtemisa Central minister ana dang, temeim mapa balala inyaktsü atema

bendanglen nungi tenla aruba nokdangtsü atema ozüng yanglushiba tebilemstü lemsatep. Foreign fund nokdangba ajanga India nung sensakertem kanga takoksa angur, ta parnoki metetdaksü.

Senden nung Minister, Naqvi-ia, "India nung akhidang nungi tamangba yimsü balala amanger ajak tesünep nung alir, aser iba sobaliba ya tashi itshitsü nüngdak. Loktiliba nung yimjung aser tesünep raksatsütsü merangra ibaji ajanga India tanela raksatsütsü," ta ashi.

Senden ghonda asem ser tesadang shi amenba sülen India nung denomination balala nungi Khristan lenir 50-i India nung Khristantemi ajangshiba tebilemstü onük balala metetdakja sorkar nem

temepishiba shidi ka agütsüogo, aser iba shidiji Delhi nung tongti putir, Anil Joseph Thomas-i zünga metetdaksü.

Ajioda minister anati item tebilemstü onük ajakji asadangtsü aser akok tashi sorkari yaritsü, ta nangzuka liasü.

September 29 nü osangbenertem den jembidang Khristan lenir kati, "Minister temi onok tebilemstü onük ajak asadangtsü aser sorkari akokba tashi yaritsü, ta onok dang nangzükogo," ta metetdaksü.

Senden nungjisa National Education Policy tasenba, health education, Adivasis, lisopurtem, Dalit nungertem aser meshimejungertem tebilemstü onük süoka o lemtepa liasü.

Odisha nung Hindu nungeri Khristan kibong pezü ki rongdoktsü

Washington, D.C, September 29 (Agencies): India nung Odisha state kübok Kandhamal District nung Hindu yimsü alia amangertem Khristan kibong pezü ki rongdoktsüogo; Khristantem jagi Khristan yimsü toktsütsü memelunger saka yimdak tzübo nungi tzü ataba agi parnok meyong ki rongdoktsü, ta International Christian Concern osang ajanga metetdaksü.

Tan ita tetenzüklen Kandhamal district kübok Ladamila yimdak Hindu nungertem Khristantem dang yim tzübo nungi tzü matatsü metetdaksüba sülen yimdak Hindu aser Khristantem tsüngda mangatetep adoka liasü.

September 17 nüa Khristan tsürtem iba tzübo nungjagi tzü ataba mapag nung Hindu yimsü alia amanger nisung 15 shia arua Khristantemji amokmerena liasü. Iba sülena lokti kati yimdak Khristantem dak azük.

Hindu nungeertem azükba sülen yimdak nungi Khristan 25 shi ajen aser tang parnok ajak anasa aliba yimtsüng ka nung aliba Tenla kidang jenoka lir. Khristantem ajenba sülen anogo trok lir September 23 nü Khristan ki ajak rongdoktsü.

2008 küm August ita nunga kasa district (Kandhamal District) nung ita aika rara adokba mapang nung Khristan aika tepseta liasü. Iba mapang nungji Hindu yimsü alia amangertem yim aika nung

Tenla kitem rongdoktsü, Khristan kitem raksatsü aser aika tepseta liasü.

ICC Regional Manager for South Asia, William Stark-i, "Kandhamal nung Khristan kibong pezü amakba osang angashia International Christian Concern-i tebilemstü akar. Iba ya ajanga 2008 küm Kandhamal nung Khristan aika tepsetba aser aika jenshiba tatalokbatem yimdangi arua bilemteter. Ketdangsertem aibelenertem aputsüla. Pei tamangba yimsü nung ajemdaker tzü metadaksüba aser kiojen rongdoktsübaji tim masü. Ketdangsertem aibelenertem anema meinyakra Khristantem anema rara tulu adoktsü," ta metetdaksü.

ANOGO ABEN TSÜNGREM DEN

AGÜTSÜBA NUNG TSÜNGREM SENTSÜWANGSHIDI

Nisung kati mokurui agütsür, saka tali akar; tangar kati pai tangütsütsü tim sota ayur, saka tanüng dang tendaktsür. A.Shin 11:24

Tamang agi tenlaba ajanga rongsen dang züiner masü saka tamang nung ainer aser meyiba tali asen nem maotsür. Tenlaba yagi tamanger taküm nung Tsüngrem dang bendanga amangba kuli ka sayur. Aser iba ajanga taküm rangben Tsüngrem meyong aser asenok Tsüngremer rongsen ketdangtsür kaka jangjadaktsür.

Anungji tershilem aser koba Tsüngrem nungi maotsüba tenlasa tenladir, temulungjang taroktiba nungi mulungsoa tenlatsüla. Tamanger tajung aikati asen nem Tsüngremi moatsüba nung tershilem tenlatsü nungnanger aser asen tangatetba balala nung tershilem amshir. Saka kodang Laishiba tesayuba nung reprangdangdir Malaki 3:10 nung Tsüngrem O-i yamai ashir "Kü kidang chiyungtsü akatsü asoshi tershilem ajunga terizüngdak kidangi bener arung..." Tenla balala agütsüba ya asen nem Tsüngremi moatsüba nung asen tamang yari aser Tsüngremi meimba nungi tenlar, ano tershilem yabo Tsüngrem meyong, anungji noklang nung terjibo tepela agi Tsüngrem tenüng sanga menungnangi, tarendakba kecha makai agutsütsüla. Atangji, pai Moatsüba nungi ochishia Tsüngrem nem tenlaba nung shilem agidi.

SARASADEM

Temeim Tsüngrem, Nai moatsüba nungi onoki ochi agi agütsütsü aser Ne temoatsü asoshi Ne dang pelar. Amen.

Pastor Ponen-i yi dak sendakba kaket tasen ka sayatsüogo



"The delusion and reality of Alcoholism " kaket zülusang Nungsangmanen Aier (abelen) aser MTBA Pastor, Rev. Ponen Longchar na noksa nung angur.

Mokokchung, September 29 (TYO): Bodhbarnü Mokokchung jila nung MTBA nung pastor, Rev. Ponen Longchar-i yi ajemba dak sendakba kaket ka sayatsüogo.

Iba kaket ya taoba mapang Kasa kaket nungsa yi yi-jemer ka aser tang Clark jemer ka anepalutsü aser yi Theological College (CTC) toktsüba tsütsü yaritsü atema nung tezüngdak BD student, tasa balala lemsatepa lir. Iba kaket ya Mokokchung jila nung Unique Bakery tiplen Connect Store nung angutsü.



New Delhi, September 29, 2021: Bodhbarnü New Delhi nung Minister of State for Science & Technology and Earth Sciences (I/C), Prime Minister's Office, Personnel, Public Grievances & Pensions, Atomic Energy and Space, Dr. Jitendra Singh aser Union Minister for Culture, Tourism & Development of North Eastern Region (DoNER), G. Kishan Reddy nati kulisüa repranga lia Ministry of Science & Technology aser Ministry of Culture na tsüngda tezüngzüktep ka agidang tangokba noksa nung angur.

Yipru mopung tesashi agi Gujarat kongshitsüa akok: IMD

New Delhi, September 29 (Agencies): Bodhbarnü Indian Meteorological Department (IMD)-i, Gujarat tziyümkülen yipru tesashi ka tentetdar, anungji angopurtemi October 2 tashi Arabian tziyümleni angopui maotsüla, ta tekümdangtsü osang ka metetdaksüogo.

IMD-isa tang anogopui oa alirtem dang Bodhbar aonung tashi nung tziükümi meyipa arutsü mepishia metetdaksüogo.

Mongolbar aser Bodhbar na south Gujarat aser Saurashtra region nung tziunglu sashia arua liasü aser maneni taruba anogo ana tashi state nung tziunglu sashia arutsü, ta India Meteorological Department (IMD)-isa metetdaksüogo.

Taruba anogo ana tashi

Amreli, Bhavnagar, Rajkot aser Jamnagar districts, Anand, Bharuch aser tanga tesem aika nung tziunglu kanga sashia arutsü, ta IMD-i metetdaksü.

Bodhbar nikongdang IMD-i, 'Gulab' cyclone mopung ano mesüngjem aser anepdang 8:30 ako nung iba yipruji south Gujarat region aser Gulf of Khambhat temeket nung liasü, ta metetdaksü.

"Iba yipruji west-northwest tsütsüleni aotsü aser Brihostibar tashi nung tesashiba akümtsü. Iba sülen maneni west-northwest tsütsüleni oa ghonda 24 tashi nung ano tesashiba akümtsü. Iba sülen maneni west-northwest tsütsüleni oa Pakistan-Makran tziyümküm atongtsü," ta parnokisa metetdaksüogo.

Iba dak sendakba nung

IMD-i angopurtem dang Bodhbar nungi tenzüka Honibar tashi Gujarat tziyümkülen nungi Arabian tziyümi angopui maotsü aser ango apuba dak sendakba maparen ajak anena atatsü t e k ü m d a n g t s ü metetdaksüogo.

Parnokisa tziyümi oa alir angopurtem danga Bodhbar aonung tashi nungbo tziükümi meyipa arutsü metetdaksüogo.

Tang tashi nung Gujarat nung tziunglu shilem 90 aruogo, ta state Special Emergency Operation Centre (SEOC)-i metetdaksü.

Mongolbarnüa Dangs, Valsad, Narmada, Ahmedabad, Anand aser Tapi densema district aika nung tziunglu sashia arua liasü, ta SEOC-i metetdaksü.

Taoba Punjab CM, Captain Amarinder Singh-i Amit Shah ajuru

New Delhi, September 29 (Agencies): Anogo ter tejaklen Punjab Chief Minister menden toktsüsang, Captain Amarinder Singh-i Bodhbarnü New Delhi nung Union Home Minister, Amit Shah ajuruogo, aser pai Congress toktsür BJP nung adentsüa akok, ta osang angazüker.

Bodhbarnep nikongdang 6:00 ako meta Amarinder, Amit Shah'er ki tonga aoba sülen tena ghonda ka shi senden amen.

Amarinder Singh den külemi inyaksemer kati, "Captain Delhi nung aliba agi pai home minister ajuru," ta metetdaksü.

Tena ajurutepa senden amenba sülen Shah'er kidang nungi ayazüka aluba mapang nung Singh ket nung 'file' ka amer liasü.

Mongolbarnü Singh Delhi tonga oa liasü. Congress bangdak lenirtemi pa mezüngmeshiogo aser ibaji ajanga pai Punjab chief minis-

ter menden toktsü, ta shia pai party dang mepelar.

Punjab chief minister menden toktsüba sülen Amarinder Singh-i, Congress lenir ana- Rahul Gandhi aser Priyanka Gandhi Vadra na dak 'experience' mali, ta aija liasü.

Osangbenertem den jembidang Singh-i, "Priyanka aser Rahul na ya ozü tanurtem amai lir. Tenati yamai meinyak tajungba süla. Kü melung yiruogo," ta jembia liasü.



September 29, 2021 nü Howrah (West Bengal) nung taoba mapang Goa chief minister, Luizinho Faleiro aser tangartemi West Bengal Chief Minister Mamata Banerjee ajurua senden amenba sülen tangokba noksa nung angur.

LS menden 3 aser assembly menden 30 atema Oct. 30 nü election agitsü

New Delhi, Rongjui/September 29 (Agencies): Bodhbarnü Election Commission of India (ECI)-i Lok Sabha menden asem aser state 14 nung assembly menden 30 atema October 30 nü by election agitsü, ta sangdongogo.

Lok Sabha menden asemji Dadra & Nagar Haveli, Khandwa (Madhya Pradesh) aser Mandi (Himachal Pradesh) lir. Assembly menden 30 rongnung Assam nung menden pongu; West Bengal nung menden pezü; Meghalaya, Himachal Pradesh aser Madhya Pradesh shia nung asemsem; Rajasthan, Karnataka aser Bihar nung menden anana aser Andhra Pradesh, Telangana, Mizoram, Nagaland, Haryana aser

Maharashtra shia nung menden kaka atema by election agitsü.

Election agiba sülen November 2 nü votes azüngtsü.

Election Commission-i, "Linük nung coronavirus wave tasembuba tenzüksü, ta bilema liasü, ajisüaka wara tensa tanaben asadangba mapang nung yamaji mataloktsüa akok ta asadangtetogo. Anungji election atsülangba dang nungibo tanüngba by election ji odang agiadoktsü atema EC-i lemtet," ta metetdaksü.

By election agitsü atema EC-i wara tsütsülen nungi dang asadangba masü saka tziümetsüng lendong, benjung balala aser tsüngsang-mopung lenlatem nungia asadanga liasü.



September 29, 2021 nü HIMA Dialysis Center, Malappuram (Kerala) nung Congress lenir aser MP, Rahul Gandhi-i lokti senden ka nung jembiba noksa nung angur.

BJP-i Uttarakhand election nung takok tulu angutsü: JP Nadda

Dehradun, September 29 (Agencies): Bodhbarnü BJP Tir, JP Nadda-i, 2022 küm Uttarakhand assembly election nung BJP-i takok tulu angutsü; gol ana aketba sorkari state nung terenlok mapatem inyakba nung ajemdaker Uttarakhand election nung takok tulu angutsü, ta ashi.

Dehradun nung BJP pur Shakti Kendra conveners aser incharges senden nung jembidang JP Nadda-i, election nung booth level nung inyakertemi tongtibang shilem ka agir, ta ashi.

Paisa booth level nung inyakertem dang grassroots nungi party tashi itdaksütsü aser state sorkari inyakba terenlok mapatem nüburtem nem metetdaksütsü ajungshi.

"Taoba mapang party Tir, Kushabhau Thakre sor küm 100 ajungba küm nungtem nung party tashi itdaksüba mission nung shilem agitsü ni nenok ayongzükter. Ibaji ajanga asen lenir nem chichiba akhüm agütsütetsü," ta pai ashi.

Uttarakhand nung alirtemi Narendra Modi lenisüba nung tamang katetba ajanga 2014 küm Lok Sabha election nung Lok Sabha menden ponguprongla nungi party-i takok ngua liasü; 2017 state assembly election nunga

menden 70 nungi party-i menden 57 nung takok ngua liasü, ta BJP National Tirisa metetdaksü.

2019 küm Lok Sabha election nunga BJP-i state nung Lok Sabha menden ponguprongla nung maneni takok ngua liasü, aser maneni sangküm assembly election nunga party-i takok tulu angutsü, ta paisa metetdaksü.

"Ato kilonser leniba kübok chief minister Pushkar Singh Dhami-i terenlok mapa jenti inyakogo, aser ibaji ajanga 2022 assembly election agiba sülen BJP-i maneni sorkar akümtsü," ta pai ashi.

"India nung Ato kilonser leniba nung alima nung Covid vaccine tajung ana yanglutetogo aser tang alima nung vaccination campaign tulutibaji India nung agidar. Ato kilonser asoba anogomong- September 17 nü kija nunga nisung crore 2.5 dak temai vaccine agia liasü," ta pai ashi.

"Uttarakhand nung tang tashi nung nisung crore 1.5-i vaccine agiogo, aser iba nungji mezüngbuba dose agir lakh 74 aser dose anaprong agir lakh 31 lir," ta pai metetdaksü.

Paisa party nung inyakertem dang taküm December ita tashi nungbo ajaki vaccine agir alitsü atema nüburtem dang vaccine agitsü atema ajungshitsü metetdaksü.

Ecuador tepuokdak rongrong adok; nisung 24 asü

Guayaquil, Rongjui/Sept. 29 (Agencies): Guayaquil nung aliba tepuokdak tesem ka nung alirtem tsüngta prangbong aser grenade amer raraba mapang tepuokdak alir nisung 24 asü aser nisung 42 yiru, ta Ecuador indang national bureau of prisons (SNAI) ajanga ashi.

Guayas state Governor Pablo Arosemena-i Litoral prison kima nungi Mongulbarnü osangbener den jembiba mapang, tensa aziökogo, ta ashi. "Sorkar aser ozüng aliba metetdaksütsü," ta pai ashi.

Regional police commander General Fausto Buenano-i ashiba agi, asürtem ya kar injang agi khasetba aser kar grenade agi poksetba lir.

Prison bureau nungi sangdongba ya Tir Guillermo Lasso-ia tanaben tweet süa liasü aser Mongulbarnü iba timtem atalokba sülen Littoral Penitentiary nung tensa

aziökogo, ta ashi.

Prangbong kotari aser tapoktsü oset amshiba lendong ya Los Lobos aser Los Choneros prison gangs tsüngta mangatetep adokba nungi lir, ta ketdangsürtemi ashi.

Tepuokdak alirtemi mokozü longa aliba window nungi injang khaloktsüba aser tapoktsü osettem pokdaksüba television nunga sayuogo.

Ecuador indang prison system ya Mexico nung temesepba mozü shibelenba telok, talisa Sinaloa aser Jalisco New Generation cartels den sendaktepa alirtem asoshi raraba tesem ka ama kumogo.

Ecuador nung rongnenba yimti tongtipangtiba, Guayaquil ya north aser talisa United States leni South American cocaine shibelenba tesep ka lir.

Taoba hopta police temi Guayaquil nung aliba tepuokdak ka nungi pistol ana,

revolver ka, injang 500 shi, hand grenade ka, kotari ishika, dynamite stick ana aser teka agi yangluba tapoktsü osettem nguteta liasü.

Hopta ana tejakdang Guayaquil nung aliba Prison Number 4 ya drones amshia amak, koba international cartels tsüngta raraba shilem ka lir, ta prison ketdangsürtemi ashi. Iba lendong nung asüamaba meliasü.

Ecuador indang prison system nung nisung 29,000 ayutsü atema facilities 60 shi yanglua lir, saka nisung tali puoka ayuba aser staff tem agi anüngba ajanga khuret agütsür.

2020 küm tepuokdak nisung 103 tepset, ta Ecuador indang human rights teloki ashir.

July ita tepuokdak tesem ana nung rongrong adoka yangji alir nisung 27 asüba sülen sorkari state of emergency sangdonga liasü.

Tunisia PM inyaksü tetsür ka shimtetogo

Tunis, Rongjui/Sept. 29 (Agencies): Tunisia Tir Kais Saied-i Najla Bouden Romdhane ya linük nung tetsürtem rongnungi mezüngbuba ato kilonser shimtetogo, shiba kanga jangja memetetba university engineer ka lir aser World Bank den inyaka liasü. Tir Saied-i yimtenren tsütsü tashi timba agir ita ana lir iba osang ya sangdonger alitsü.

Linük nung timtem balala ajurua aliba mapang Romdhane ya ato kilonser inyaksü.

Saied-i taoba ato kilonser magizük, parliament anena atadaksü aser July ita executive tashi aika agi aser tang sorkar tasen ka tentetsü atema nübürtem aser alimai ajungshir.

Taoba hopta pai constitution timba mamshitsü lemtet aser ozüng tashi aliba totuyuba

agi yimsü asütsü, ta shia liasü.

Pai taoba hopta sangdongba provisions kübok Ramdhane ya shimtet aser la dang tekeratiba nung sorkar tasen ka tentetsü ashi, ta tir office ajanga social media nung ashi.

Saied indang office ajanga video ka sayaba nung pai Bouden den pa indang office nung ajurutepa anguogo aser iba mapang pai mapang tatsüka tsüngta cabinet ka shimtsü nungloksü.

Pai tetsür ka shimtetba ya otsü tasen ka lir, ta nenshia ashi aser ibai Tunisia aser Tunisia tsürtem nem akum agütsüba lir, ta ashi.

Sorkar tasenba nukjidong tongtipangtibaji ochimashi inyakyim aser rongrongshirong tembangdaksütsü ya lir, ta Saied-i ashi.

2011 küm nübürtemi yimten yimsüsür anema nokdaka mapang talangka

nungi kijai yimsü süa arusang Zine El Abedine Ben Ali atsingdokba sülen Bouden ya Tunisia indang ato kilonser ter buba alitsü.

Iba sülen democratic yimya dangi melenba atema alimai iba linük tenüng asang, saka Tunisia nung aikati par libaliru nung temelenshi kangabo majiteter, ta ashir.

Saied-i mera agiba ajanga tir kabu nung executive tashi tulu yutsür aser pa ya cabinet nung tekolakba asütsü.

Pai September 22, 2021 sangdong ka nung parliament anenja aliba atsülangshitsü shia liasü.

Najla Bouden ya Saied ama arishi küm 63 lir aser la ya taoba mapang higher education project, PromESSE nung director inyaka liasü aser Tunisia indang higher education ministry nunga tekolak mapa inyaka aru.

Afghan airspace-i US drones aitra timtem ajurutsü: Taliban

Kabul, Rongjui/Sept. 29 (Agencies): United States-i Afghan airspace nung drones senzüdaksüba manenra timtem ajurutsü, ta Taliban-i tekum dangtsü shiogo.

Taliban indang Twitter account nung Bodhbarnü sangdongba nung, "US-i international rights aser law ajunga nung aibelen aser Taliban den Doha, Qatar nung jembiba ama meinyaki Afghanistan nung drones amshir," ta shia liasü.

"Timtem nungi kumzüksü mechi onoki linük ajunga dang, aser talisa United States dang Afghanistan ya international rights, laws aser jembiba ama amshitsü ajungshir."

Washington-i August 30 nü Afghanistan nungi ainshiba sülen Taliban den tesendaktep

mejungu aliba ano tali tamajungba tiai aitsü tensa ka nung lir, saka US ketdangsürtemi telangzüba kecha agüja mali.

Taliban-i tanaben yimsü asü tenzüka sülen US-i tensendaktep yanglutsü atema sentong ka yangludanger, saka parnoki sorkarbo magizüker.

Ajisüaka Afghanistan nung aliba al-Qaeda tanaben shia arutsü teimla aser ISIL (ISIS) den sendaktepa aliba teloktem tashi itshiba ajanga Afghanistan nung timtem mapang yariteptsü renema alitsü, ta US ketdangsürtemi ashir.

US yagi technology amshia itdangiterba aser danga linük nungi amakba nung temolung agütsütsü amai aikati angateter.


US aser Taliban ajanga Islamic State in Khorasan Province, ISKP (ISIS-K) ya tsükchir ama züngshir, anungji amalitep akatsü amai ajiteter.

August 26 nü Kabul nung US-i amokbanga aliba international airport amakba ISKP ajanga tenüng agia lir aser ano parnoki tawa Jalalabad yimti nunga bomb poklokja liasü.

August 29 nü US drone amshia Kabul nung amakdang ISKP züngsem masü saka civilian ang ter tepset, ta Washington-i nangzük.

Afghanistan nung US-i al-Qaeda dak tenük yokba aser mitba nung Taliban-i amalitep malitsü amai ajiteter, kechiaser Afghanistan nung al-Qaeda züngsem mali, ta Taliban-i taoba mapang shia lir.

MENUNGRA BILEMTETER



TALIKABA LONGKUMER (LONGSA)

Temeim Oba, na iba akümüli nungi pilar tanü küm pungo abensa arudang onoki na menungra bilemteter. Na onok den meliaka nü mapa tajungtem onok mulungjang nung teti lir aser mamateter. Künü anogo asenok ajak tepela nung ajuruteptsü teti onok sarasadem.

~ Temeim kinungtsü, chirnur aser kinunger

OFFICE OF THE MANGMETONG VILLAGE COUNCIL MOKOKCHUNG, NAGALAND. KHUKHUA AITSÜR

September 13, 2021 nü Imtioza kinungtsü Easter tepsetba maparen nung SDPO Chuba Chang-i anir Mokokchung Police Special Investigation team ajanga kanga kera aser mapang shidak nung mapa tamajung inyaksang, Aowati, GB, Yimyu Ward, Mokokchung apuba atema Mangmetong Village Council ajanga tenüngsang agütsür.

Nisung meimchir molungsentsü agi magizüketba mapa tamajung Aowati-i inyakba atema Mangmetong Village Council ajanga khukhua aitsür. Iba ama mapa tamajung inyaker atema ashiteter aliba lokti nung talidak maka. Tim ketdangsürtemi menua melie aibelener nem ozüng nung aliba ama tapet temerenshi agütsütsüla. Aser tensa kecha nunga mapa tamajung inyaker nem bail magütsütsüla.

Limawati Imchen
Secretary
Mangmetong Village Council

**Limawati Imchen
Secretary**

Mangmetong Village Council

Yudang
Chairman
Village Council Mangmetong
Mokokchung, Nagaland

**Yudang
Chairman**

Mangmetong Village Council

Japan ato kilonser menden nung Fumio Kishida amentsü

Tokyo, Rongjui/Sept. 29 (Agencies): Japan indang taoba Foreign Minister Fumio Kishida-i ruling party lenir indang election nung takok nguogo, anungji pa ya linük nung taruba ato kilonser akumtsü jenjang ngutetogo.

Bodhbarnü election nung Kishida-i vote 257 nguteta Taro Kono madak takok angu, shiba kanga nungtugu vaccine minister lir aser taoba mapang defence aser foreign minister inyaka liasü.

Arishi küm 64 tain Kishida yagi party lenir Ato Kilonser Yoshihide Suga melentsü, shiba taoba küm September ita nungi tenzüka küm ka inyaker mana nungi anener.

Kishida ya Liberal Democratic Party (LDP) lenir tasenba asünung, pa ya Hombarnü parliament nung ato kilonser shimtettsü, kong par party aser coalition tem timba lir.

Pai LDP anir November 28 nü agitsü aliba general election nung shilem agitsü.

Party nung nübu tejangja temi Kishida busema liasü, shibai linük tashi ita alitsü atema inyaksü nükla lir. Vote 425 aliba nungi arishi küm 58 tain Kono-i vote 170 nguteta liasü.

Tetsür ana, arishi küm 60 tain Sanae Takaichi aser arishi küm 61 taon Seiko Noda na round mezüngbuba sülen iba tetoktepa yutsü.

Kishida-i takok anguba ajanga sentong balala nung temelenshi kangabo malitsü amai ajiteter, kong COVID-19 tashidak wara agi raksatsür aliba rongsenketzüng tanaben shia arudaksütsü meranger.

Japan indang defence tsütsü tashi itshitsüla aser United States, Australia aser India den security tesendaktep tajungba kumdaksütsüla aser China den rongsenketzüng tesendaktep wazüka yua mapang shia senden amentsüla, ta pai ashir.

Kishida-i Japan indang coast guard asendenshinür aser China-i Uighur minority züngsemtem mejungu amshiba aitsüba pangzüng busemer. China nung human rights tensa asadangtsü atema pai prime ministerial aide ka shimtsü tejangraba lir.

Kishida ya taoba mapang LDP police chief inyaka liasü aser 2012-17 tsüngta foreign minister inyak, aser iba mapang pai Russia aser South Korea den pangzüng kar yanglutepa liasü.



CHRISTIAN HIGHER SECONDARY SCHOOL

NYAMO LOTH ROAD, DIMAPUR 797112, NAGALAND

E-mail: christian.dimapur@gmail.com / Website: www.chssdimapur.com

Motto : **IN LOVE AND TRUTH WE STRIVE**

WE DESIGN YOUR CHILD'S FUTURE: WE BUILD YOUR CHILD'S CAREER

ADMISSION FORMS

for 2022 session (Classes A-7)

available during office hours (9 am to 1 pm)

SPECIAL FEATURES

- 🔗 Smart Board Classrooms
- 🔗 Robotic Lab (ATL)
- 🔗 Scripture Retreat & Counselling
- 🔗 Career Guidance Cell
- 🔗 Summer Bible School
- 🔗 Hostel for Boys
- 🔗 NCC
- 🔗 Scouts and Guides
- 🔗 Club Activities
- 🔗 Bus Service

Limited Seats

Longsolongben atema dang masü musician nem tagütsütsü tim agütsütsüla



* 1993 Goa Concert



* Governors Award agizuker kulen



* Live concert

Mokokchung, Rongjui/September 29, 2021 (TYO): Nagaland nung music ya jenjang kangabo meketi wawa-menü aser longsolongben (entertainment) nükjidong atema dang amshir, iyongji Naga nung musician-tem tejakleni maor. Ken bushidang - mapang, nübu shisatsü aser rongsen intokbaji musician-temi dang metet aser concert/show ka atema ken bushidang nübutük den rongsen atama intoker masü aser music dak sentakba osetsüset ajakji senotsü sentaka lir, music luyim ya jenjang kanga tasak, anungji, musician-tem nem tagütsütsü tim bo agütsütsüla aser parnokji ajungshitsüla, ta nungtugu Squadron Band nungi Bassist K. Lanu Aier aser Vocalist Wati Imchen nati iba osangbener den sensaksem dang metetdaksü.

Nagaland nung music luyim renloktsü atema tebilemba kar lemsatepdang, Hornbill International Beat Contest ya tesüsabuba atema ayutsü, saka iba lenla nung küm piyong district balala nung kentener aser kongki atemer/awar (musician)-tem talisa yimdak yimtsüng (grass root) nungi anitentsü aser ajungshitsü atema tetoktepba tapu balala ayonga akatsüla aser iba nung

jagi tajungtem shimteta sabang tuluba nungji shilem agidaksütsü aser musician-tem tejakleni aotsü atema lenmang balala sayu nungbo kanga ajungtsü. Item mapatem ajanga sempet aketertem jenti adoktsü imlar, ta Wati Imchen-i sorkar nem inyakdaksünüba o kar ashi. Naga nung music tsütsü sempet aketer jenti lir aser maneni adokdar, anungji, music industry ka kümdaksütsü asoshi tim lenmang nung sen ji shitak intoktsüla (invest asütsüla), ta paisa shisem.

Nagaland sorkari mapang langrara music tongtibang indang ya mangateti aru, menurang angatetba ajanga tanü asen state music jenjang iba tashi dang lir. Anungji, tangar menepa tejakleni aotsü asoshi ano mapang talangka agitsü, ta K. Lanu Aier-i tajitetba kar lemsatep. Nagaland nung musician-temji benjong longsodaksür ka dangbo masü saka parnok nem tagütsütsü tim shitak agütsütsüla, saka tesasatsüka tanü nüburtemi music jenjang kanga jungabo mangatet, ta paisa shisem. Yimya agi music luyim ya jenjang kanga tasak, yangi senotsü intoklen aika sentakba lir, anungji, ibaji nüburtemi angatetsüla, aji mangatet tashi asen lima music tsütsü kodanga maintsü, ta paisa

kuli kar dena ashi.

Asen lima music tejakleni odaksütsü atema mezüngbuba kati ka nungitpepa ajungshiteptsüla. Na musician ka mesüaka kenten sentong (concert/show) balala jagi arua reprangtsüla. Taoba mapangbo tang amai kidang mapang intokdak aika maliasü, iyongji, concert reprangnür aika liasü, saka tanübo tesasatsüka concert reprangi arur mali kümogo, ta Wati Imchenisa ashi.

Tanü lanur musician tajung aika adokdar aser sempet aketer jenti lir, saka asen lima music tsütsü ngujem (scope) kanga temesü asüba ajanga tapu aika merangdang saka tsükdakradang balala ajuruba ajanga alizüng metongteter, ta K. Lanu Aieri ashi.

1990's mapangbo Mokokchung nung band-temji tetoktepba nela agi sünger liasü, iyongji memeteti band tajung aika adok, saka tanü reprangdangra lanur musician-tem ya teimbaka peipei meten dang aser online nung dang temulung agütsü. Ashiko, tanga kulijia alitsü akok saka Nagaland nung band tajung madokbaji ibajia kuli ka asütsü südi. Band tajung ka adoktsü atemaji ajurutepa ken tentepstüla/temshitsüla, aji mesüra peipei meten dang ao

nungbo kija (individual) bo tajung adoktsü akok, saka band sasep bo tajung adoktsü lenmangji kanga temesü, ta Wati Imchen aser Lanu Aier nati ajitetba kar lemsatep. 1990's mapang nungji musician tajung aika liasü saka music metsünga reta (serious süa) agir aika maliasü, iyongji band aika metitemi motet anenatokba kuli kar tenatisa shisem.

Squadron band ajanga Nagaland nung rock music tsütsü mezüngpur süa nungtugu kümdakja shilem tajung agiba reprangteta konang tulu aketba Governor's Award for Excellence in Music 2020 senpet agütsüogo. Squadron band ya 1990 nung tentet aser par band asoshi mezüngbuba show-ji 15th August, 1990 anogo liasü aser par band küm 30 shitak abensadang iba award ya agizük. "Iba award angutsüsa temoatsü ya ozü band member O. Temsü Imsongi onok nem yutsür ao amai onoki agir", ta Wati Imchen-i ashi. "Iba award agizükdang medemer ka malibaji tepela agi meperir aser sasaa bilemer", ta Lanu Aierisa menungraseta ashi.

Squadron band nung züngsemtemji; Wati Imchen (Vocal), K. Lanu Aier (bassist),

B. Bendang Jamir (guitar), Imtimar Tzüdir (drums) aser Lt. O. Temsü Imsong (guitar) parnok lir. Guitarist O. Temsü Imsong 17th June, 2020 nü cancer agi shiranga asü. Squadron band wangshiba mapang parnok Nagaland kübok yimti balala nung dang masü, North-East India tesem balala den Chennai, Bhopal, Pondicherry, Goa amala nung ken tena jajaba par band otsü nung lir. Nagaland nung rock music nungtugu kümdaksübaaji par band ya lir ta tanü tashi züngshir aser nüburtemi jembir. Adangji Squadron band memeteter aikabo malitsü.

Nagaland nung Squadron band-i music luyim nung shilem tajung agiba reprangteta Task Force for Music and Arts (TaFMA)-i "Squadron: For the love of life and music" ta sür kaketi ka taküm 2021 March ita nungto adokogo. Iba kaketi senpak 300/- yong Nagaland nung tongtibang kaketi ayokdak angutsü. Iba kaketi nungji par band koma ajurutepa tenzük, parnok ajangshiba timtem balala, tesem balala nung shilem agia jajaba aser temenungratsü otsü aika shia angutsü. Kaketi ka alir züngdang nung dang nai hau asütsü!

PELABA LEMSATEPER

15.06.1933



23.09.2021

Asür Chubamong Walling (Khar) kinungtsü asür **Mrs. Tekayangla** September 23, 2021 nü iba lima nungi ajungbena pilaa aoba mapang kija, kibong, tembar, kinunger, kidanger aser temeimertem shirnokisa onok shi, tanüla aser rongsen agi nongita yariogo, nenok ajak dang asür kinungertemi kanga pelaba lemsateper.

Nenok ajaki dangi tsüngtong arua tepela melemsatetba atema kanga sasaa bilemer saka tulusang Tsüngremi nenok ajak molamoshia moajang ta onoki sarasademsür.

~ Temeim kinungertem.

OFFICE OF THE YISEMYONG AROGO LAISHIR TELONGJEM TENÜNGSANG AGÜTSÜR

Yisemyong Laishir züngsem rongnungji, **Wb. Imochujang Longchar**, S/o Lt. Wb. Lipokmar Longchar aser Wt. Imlitula Aier (Süngratsü), pai UTC Bangalore nungi "The Contest Hagemony: Revisiting the role of Protestant Indian Christian towards National Building in the Nineteenth and Twentieth Centuries India", thesis nung ajemdaker Ph.D degree ngutetba atema YALT-i tenüngsang agütsütsüba den tepela iba sabang ajanga lemsateper.

Tsüngremi pa wadang nung maneni moajang ta sarasademer.

Sd/-
Wb. Chubazulu
Tir

Sd/-
Wt. Temsüangla
Tongti zülur

21buba NSF trophy October 9 nü nungi tenzüksü

Kohima, Rongjui/September 29 (Agencies): 21buba Naga Students' Federation (NSF) martyrs memorial (football) trophy ayongzüka asayatsü atema Angami Students' Union (ASU) renemshidar. Iba asayamung ya Indira Gandhi Stadium, Kohima nung October 9 nungi November 6 nü tashi asayatsü.

ASU office nung osangbenertem den sensaksemba mapang Organising Committee convenor Dievi Yano aser tanga ASU ketdangsürtemi ashiba agi, iba asayamung nung takoker nem ajak senteper senpet sen lakh 5.40 aser takok marok agütsüsü, renema lir ta ashi.

Asayamung akoker nem senpet sen lakh 2 aser runner-up nem sen 1.5 lakh agütsüsü. Semifinal nung tamakok

anguba team ana nem senpet sen 30,000 agütsüsü aser quarter final nung tamakok angurtem nem senpet sen 15,000 agütsüsü.

Tir-isa, highest scorer, best custodian, best defender, aser best mid-fielder nem senpet sen 10,000 (nisung shia) agütsüsü ta ashiba den player of the tournament nema sempet tajung ka agütsüsü, ta ashi.

Asayamung nung shilem agitsü atema form benoktsü asoshi tatembangbuba anogoji October 6 nü ta metetdakja pai, form tem NSF office, ASU office, Sports Paradise, Ruluo Market Keziekie, Sports World, KK Motors Royal Enfield, High School area aser Falcon Corner Medziphema, G-Sports, Chumukedima, aser Kiran Sports, Dimapur nung angutsü ta metetdaksü.

Asayamung ayongertemi ashiba agi, asaya mapang COVID dak sendakba inyakyim ajak benoka inyaksangshitsü aser asayartem dak tashidak keta aliba temaitsü mesayutsüla mesera parnok vaccine dose anaprongla mesera asayamung metenzük tsüngda anogo 15 jelia vaccine mezüngbuba dose agir alitsü nüngdaker, ta ashi. Vaccine magirtemi negative test report sayutsüla, ta parnokisa metetdaksü.

Maneni Yano-i ashiba agi, October 9 nü asayamung lapokba sentong aser quarter finals nungi asayatem ajak aonung asayatsü, ta ashi.

Paisa, asaya reprangi arurtem dang league nung ticket taa sen 30 agitsü aser quarter final round nungi ticket jenjang ajungkettsü, ta metetdaksü.

Champions League: PSG, Sheriff aser Atletico nungeri takok nguogo

Berlin, Rongjui/September 29 (Agencies): Mongolbarnü Champions League asaya nung Lionel Messi-i Paris Saint-Germain (PSG) atema mezüngbuba goal idaktsü aser Luxembourg midfielder Sebastien Thill-i asaya tatemtsü lia goal ka idaktsüba sülen Sheriff puri CL 13 ben tashi koker aliba Real Madrid team kokogo.

Messi-i goal ka kanga junga idaktsüba sülen parnoki goal 2-0 agi Manchester City madak takok ngua liasü.

Kasa mapang nung Moldovan club Sheriff-i Madrid 2-1 agi kokogo. Asaya nung Madrid puri goal idaktsüsü asoshi maangka aiben angu saka Greek goalkeeper Giorgos Athanasiadis-i ball kanga junga nokdanga asayaba sülen asaya tatemtsü lia Thill-i goal ka idaktsüba sülen parnoki goal 2-1 agi asaya akok.

Maneni Atletico Madrid nungi asayar Luis Suarez-i atakzüka aliba asaya mapang tembangba sülen mapang apuloktsür asayaba mapang penalty ka idakja goal 2-1 agi AC Milan koka liasü. PSG aser City na asaya nung mezüngbuba goal ya midfielder Idrissa Gueye-i asaya tenzük minute minute tibuba nung idaktsü.

Iba sülen City puria goal idaktsüteter lila saka Raheem Sterling aser Bernardo Silva nati metsüba ball crossbar nung odaker adok aser iba den Gianluigi Donnarumma-ia ball kanga junga nokdanga ajanga City-i goal midaktsütet.

Telok ana tsüngda kanga toktepa asayaba sülen minute 74buba nung Messi-i tanbuba goal idakja parnoki asaya akok.

Real Madrid aser Sheriff na asaya nung mezüngbuba goal Uzbek forward Jasurbek Yakhshiboev-i minute 25buba nung idaktsü. Iba sülen asaya tanabuba shilem nung Madrid atema Karim Benzema-i goal ka idakja goal kasasa aküm, ajisüaka asaya atemtsü lia Thill-i goal ka idakja Sheriff puri iba asaya goal 2-1 agi akok.

Group B asaya nung Spanish champion Atletico puri 2-1 agi Milan kokogo. Asaya nung mezüngbuba goal Rafael Leao-i Milan atema minute 20buba nung idaktsü. Asaya nung Franck Kessie yellow card ana achiba sülen asaya nungi tugudaktsü.

Asaya kanga toktepa asayaa arur minute 84buba nung Antoine Griezmann-i Atletico atema goal ka idakja goal kasasa aküm aser Suarez-i mapang apoloktsür asayaba mapang penalty ka ajanga goal tanabuba idakja parnoki asaya akok.

Manny Pacquiao Boxing asaya nungi anenogo

Rongjui/September 29, 2021 (Agencies): Nüngtugu Boxing asayar Manny Pacquiao, shiba 2022 Philippine elections nung tir atema tokteptsü sentong lir, pai Bodhbarnü pa yimden yimsüsüba nung rangloker inyaksü atema boxing asaya nungi anentsü telemtetba agiba sangdongogo.

Pacquiao ya Philippine senator ka lir aser pa boxing asaya aser yimden yimsüsüba na mapang lemdanger inyaksangsia aruogo. Pai asaya nungi anenba osang ya pa indang official Facebook page nung video osang ka ajanga lemsatep.

"Ni tatembangbuba tsüngtsüng angashiogo. Boxing asaya tembangogo," ta Pacquiao-i ashi, shiba alima nung boxing asayartem rongnung divisions balala ti nung world titles amenba asayar pa kija lir.

"Ni iba anogo yagi menepa arutsü ta imlaa

maliasü," ta Pacquiao-i ashiba den pai alima ajunga nung pa indang fan tem dang kanga pelaba lemsatep.

Pacquiao ya footwork kanga ajungba aser kanga kara atsüngba atema kanga nüngtugu lir aser pa boxing asayaba puti otsü nung offensive asayartem rongnung tajungtiba ka ta züngshir.

Promoter tejen Bob Arum-i 2010 küm, Pacquiao ya tangar shinga dena medemdagtsü makok aser pa Muhammad Ali dang nungia tajungba ta ashi. "Pa indang teka tachichi aser tabelen napronglai tashi kasa dang tsüngteter aser ibajagi pai pa den asayartem akoker," ta Arum-i ashi.

August ita arishi küm 42 tain asayar ya WBA welterweight world title asaya nung Cuba nung asayar Yordenis Ugas-i tsükdaktsü.

Philippines nung soa ainba mapang Pacquiao'er kibong ya kanga sensaker liasü aser iba ajanga taküm

liyonga aotsü atema pa mapa balala inyaksüsa aküm. Pa asangur chanu ka dang asüba mapang linük yimtiba Manila-i rong ka nung mener ao aser boxing asaya tenzük.

Philippines tir Rodrigo Duterte-i temesempba mozü nokdangtsü aser tasüba agi temerenshi agütsüsü atema ozüng tanaben benokshitsü atema raraba mapang Pacquiao-i pa pusema liasü. Ajisüaka China den tesendaktep ayuba aser sorkar inyakyim nung ochi mashi aliba ajanga Pacquiao-i Duterte aitsüba sülen tena tsüngda tesendaktep mejungi aküm.

Pacquiao, 2007 küm election nung mezüng toktep saka tamakok angu. Iba sülen 2010 küm pai Sarangani province nungi election koka congress lower house nung züngsem ka aküm.

Maneni 2016 küm pai election koka küm trok atema upper chamber nung züngoksem.



South Asian Football Federation asayamung atema India team Football Association of Maldives artificial pitch nung renemshiba mapang tangokba noksa nung angur. India-i tang tashi nung iba asayamung tenetben koka lir aser October 4 nü National Football Stadium nung Bangladesh den asayaa iba asayamung tenzüksü.

MI-i Arjun Tendulkar melener sangdongogo

Rongjui/September 29, 2021 (Agencies): Mumbai Indians-i Indian Premier League (IPL) 2021 season atema Arjun Tendulkar temelen asayar sangdongogo. Arjun yiruba ajanga masayatetsüsa aküm.

MI sangdong ka ajanga, "Mumbai Indians-i IPL 2021 season tanungba atema Arjun Tendulkar melena Simarjeet Singh shimogo. Right-arm medium-fast bowler ya IPL tetuyuba dak ajemdaker quarantine mapang tembangogo aser training agi tenzükogo," ta metetdaksü.

Auction nung MI-i nüngtugu India nung cricket asayar Sachin Tendulkar'er jabaso Arjun ya sen lakh 20 agi alizük. IPL 2020 nunga Arjun ya MI team den net bowler ama UAE-i ao.

Auction masü tsüngda Arjun-i Police Invitation Shield Cricket Tournament 2020-2021 Group A asaya nung ball 31 nung out mesüi run 77 yangluba den wicket 3 agia MIG Cricket Club-i Islam

Gymkhana run 194 agi akokba asaya nung teyari agütsüba sülen pa kanga tushia liasü.

MI pur 2021 IPL tanabuba shilem junga metenzükter aser parnok asaya asem tashi atonga tamakok nguogo. IPL 2021 points table nung jenjang tenetbubai asepzüka aluba sülen Mumbai team-i KL Rahul-i aniba Punjab Kings (PBKS) pur koka kanga dang tongtibang point ana nguogo.

Punjab den masaya tsüngda MI middle-order tem junga masayaba ajanga ashishia liasü, ajisüaka iba asaya nungbo Hardik Pandya-i out mesüi ball 30 nung run 40 yanglua takok angu.

IPL nung MI puri takok tajungtiba nguteta lir aser parnoki tang tashi nung iba asayamung pongubenbo koka lir. Parnok taruba asaya Delhi Capitals den October 2 nü Sharjah Cricket Stadium nung asayatsü. MI pur playoffs atema qualify asütsü atema league nung tanungba asaya asemprongla akoktsü nüngdaker.

BILEMDANGANG

"Tanü dang nungi asüng tajungba asütsü ta tamang ka-ang."